



宛陵先生文集目錄卷第十五

觀何君寶畫

送任太博歸省

送張學士知洪州

觀楊之美畫

李審言遺酒

送邵郎中知潭州

送楊叔恬

送洪州倅何太博

見賣瓠者

和鄰幾景德避暑

送趙諫議知徐州

送邵戶曹隨侍

哭韓舍人五首

高平公挽歌三首

歐陽郡太君挽歌

和石昌言求筆

邃隱堂

讀永叔撰薛雲衛碣

和昌言蜀牋答松管

送楊叔武廣南招安

走筆戲邵興宗

送李中舍宰南鄭

送王察推之鄧州

戲酬高負外鯽魚

送何學士知漢州

和達觀師聞蟬

和杜相公謝蔡君謨茶

和接花

送石昌言學士

書南事

送吳都官還江南

馮子都詩

赴庾直有懷

采茨

史氏南軒

送陳脩撰

和寄宣州廣教文鑒師

送陸學士泰州倅

送徐秘丞知梁山軍

和秋夕對月

目錄終

宛陵先生文集卷第十五

觀何君寶畫

燕馬易畫吳牛難圖馬骨隱細牛骨麓馬毛要密
牛毛踈麓踈必辨別細密多模胡乃知戴嵩筆能
出韓幹徒幹馬精神在韁勒嵩牛怒闔無牽拘昨
日何家觀小軸絹雖破爛色不渝二頭相觸角競
椅前脚如跪後脚舒尾株榻直脊脅感筋力寫盡
蹄腕殊一勝一敗又苦似勝者狼逐敗者趨卷窮
赤印置小字置字乃是陶尚書尚書國初人愛畫
收幾厨買時不惜金與帛帛載羊車錢載驢後世

兒孫不能保賣人窮市無須更凡目矜新不重故
千錢酬直皆咲愚四牛遂為何氏有裝背入眼天
下無坐中吾儕趣已異又喜玄女傳兵符此本實
稱閻令畫下筆簡細容顏姝三人鬼狀一牛首八
女二十美丈夫黃帝中間蔭葩蓋霞扇錯玳旌擁
朱冠服難知歲月遠但見儀衛森清都復觀鹿臺
獨夫受妲已不笑何由娛酒池肉林騎行爲剖心
斲脛堪悲吁數幅吳王宴西子綵舟張樂當姑蘇
宮娥數百簇高下鬢髻一一紅芙蓉危峯細浪得
平遠前對洞庭傍大湖商紂夫差可垂誠歷世傳

玩叅盤盃鵬鷹草木不足記特詠此事心何如

送任太博歸省西都

人言少保持家謹載見西京萬石君子舍今歸浣
裙切里門重戒下車勤田園一一能為計僮僕訢
訢亦有聞我負洛陽山水久試因行色寄嵩雲

送少卿張學士知洪州

朱旗畫舸一百尺五月長江水拍天穩去先應望
廬岳暫來誰復見龍泉閣經吏部重為記山識吳
王舊鑄錢往迹可尋軍士少贖書遺逸附青編

觀楊之美畫

天官乘車建朱旗赤幡前亞風卷披二龍緩駕蒼
髯垂印箱傍挈文籍隨雙駮推輓如畏遲行從冠
服多威儀水官自有真龍騎兩佐並跨鯨尾螭步
趨羣吏怪眼眉雲生海面無端涯雷部處上相與期
人身獸爪負鼓馳後有同類挾且提次執電鏡風
囊吹青虵有角魚足鬢上下引導神所施地官既
失不可知此畫傳是閻令為設色鮮潤筆法竒絹
理膩滑雞子皮吳生龍王多裂隳八軸展玩忘晨
炊李成山水曉景移黃荃花竹雀擁枝韓幹馬本
摸搭時神駿都失存毫釐日高腹枵眼皆眇邂逅

獲見何言疲厚謝主翁意不衰他日飽目看無遺

李審言遺酒

大梁美酒斗千錢欲飲常被飢窘煎經時一滴不
入口漱齒費盡華池泉昨日靈昌兵吏至跪壺曾不
候報箋赤泥圻封傾瓦盎毋妻共嘗婢流涎隣家
葡萄未結子引蔓垂過高墻巔當街賣杏已黃熟
獨堆百顆充盤筵老年牙疎不喜肉况乃下箸無
腥膻空腸易醉忽酩酊倒頭夢到上帝前賜臣蒼
龍跨八月不意正值姮娥眠無人采顧傍玉兔便
取作腊下九天拔毛為筆筆如椽狂吟一掃一百篇

其間長句寄東郡東郡太守終始賢切莫汲竭滑
公井留釀此醕時我傳

送邵郎中知潭州

張鏡疊吹洞庭外緣虎帶刀蠻帥迎且諭漢家綏
撫厚莫言湘守事權輕木奴洲近霜包熟班竹林
昏野鳥鳴賈誼宅邊寒井在暫留于騎漱餘清

送楊尅恬應北京辟

昔時見子死丘下丞相待子知子賢子於文字實
廣博海客謾估珠盈舩欲賣明月一寸魄雖豪木
有售以錢通都大邑忽辨寶直取不犯驪龍涎遂

作照乘物矜夸魏人前從茲十二車光彩生從先

送洪州通判何太博若谷先婦新淦

拜官江上客乘馬不乘舩獨畏蛟龍浪將婦風雨
天葛花侵野徑源水入腴田君住巴丘下西山道
路連

五月七日見賣瓠者

老圃奪天時馬通為煦嫗四月彼種瓜五月此賣
瓠陽陂與糞壤功力且異趣瓜遲瓠何早豈不同
雨露速利乃在人爭先無晚暮

和江鄰幾景德寺避暑

堙蟻不應雨鳴鳶不生風鬱氣若飢炊初陽如火
紅躄膚汗交流脂體膏將鎔龍頭費挹酌犢臯強
遮蒙常畏俗物來去避青蓮宮廣堂鋪琉璃高簷
蔭梧桐廊壁畫地獄獄具鑊鋸舂鐵城何熾熾鐵
床亦彤彤誰知炮烙死活間傳自西域黃面翁正
類人世苦此熱聲利役使亡西東京師貴貨幾椽
舍窮煎相似聒欲聾屋頭朝爨作飲食枕底夕艾
驅蚊蟲宜爾近巷江夫子賦詩特壓塵土中

送趙諫議知徐州

及

鹿車幾兩馬幾匹軫建朱幡騎鼓弓雨過短亭雲

斷續鶯啼高柳路西東呂梁水注千尋險大澤龍
歸萬古空莫問前朝張僕射毬場細草綠蒙蒙

送邵戶曹隨侍之長沙

青袍會稽掾采服湘江行水館魚方羨犀舟枕自
清鷓鴣啼欲雨蟬螻見還晴風土雖卑濕醇醪可
養生

晨起裴吳二直講過門云鳳閣韓舍人物
故作五章以哭之

平生交友淚又哭寢門前魯叟不言命楚人空問
天月沉滄海底星隕太微邊莫恨終埋沒文章自

可傳

使虜嘗專對江湖謫幾年始看還近侍遽此隔重泉
沃酒酒空滿託詞詞謾傳視予猶手足莫怪獨
潸然

筭數曾無據仁人亦莫聞狼愚多至老蘭桂苦先
焚不竟千秋恨還如萬里分臨風一號慟易散日
邊雲

昔時賓宴地今見總幃遮棲室那因鵬從盃不為
虵曾無越人術竟起漢臣嗟明日東城陌悲涼後
部笳

曉陌行車過交相歎且驚荀龍聞一蛭穆駿失全
鳴不復中書直空餘左史成緒言猶在耳尚想見
平生

聞高平公殂謝述哀感舊以助挽歌三首
文章與功業有志不能成嘗以濟高位終然屈大
名遺風猶可見逝水更無情婦上青烏壠韓城苦
霧平

京洛同逃酒單袍跨馬歸明朝各相笑此分不為
稀公既參鑪冶子將事蕨薇悲哀無以報有涕向
風揮

一出屢更郡人皆望酒壺俗情難可學奏記向來
無貧賤常甘分崇高不解諛雖然門館隔泣與衆
人俱

歐陽郡太君挽歌二首

夫人有賢子往歲謫夷陵欲使無愁鬱怡然見寢
興外詞陽磊磊內畏實兢兢濟壽復終貴共為時
所稱

當時丈人歿雖少守孤兒以及成名譽何嘗厭疾
藜暮年終饗福陰隲不應欺莫使碧江上獨傳陶
母碑

依韻和石昌言學士求鼠鬚筆之什鼠鬚
鼠尾者前遺君謨今以松管代贈

江南飛鼠拔長尾勁健頗勝中山毫其間又有蒼
鼠鬚入用不數南雞毛二物緩急豈常獲捕刺徒
爾操蠻刀舊歲已贈蔡夫子報君松管何蕭騷

邃隱堂

大梁車馬地塵土飛百尺賢愚走其間朝暮不見
迹北望天波門垣垣宗室宅宗室令王孫愛書輕
玉帛華宇何深沉但聞列圖籍曲房有窈窕空自
事眉額體胖生粹和安石處崑石古來為善樂豈

以歌鍾適

讀永祚所撰薛雲衛碣

文章如塗金光彩發美器所宜玉石間模寫傳千
祀堅堅孝子心森森栢庭闕豈與石麒麟原傍闔
蒼翠

和石昌言以蜀牋南牋答松管之什

蠻牋抽轉龍鱗細秋兔束毫雞距尖楊子校經聊
以贈蜀麻江楮報何嫌

赤蟻辭送楊紱武廣南招安

南方赤蟻大若象潛荒穴洞人莫逢天公合雨不

決雨從橫亂出將自封侵墮凌壞壞城市戰鬪億
倍南柯雄嘗聞穿山食此物此物既大非常凶張
舌流涎莫可餌枉啄不怕長戈春今令智者以智
取即見蜮醢傳太宮因而使知禍福理天子下令
雲從龍

走筆戲邵興宗

子魚一尾不曾有又諾毗陵蒼鼠毫細粒吳粳誰
下咽尖頭越管底能操

送李中舍襲之宰南鄭

莫門襲中道路難襄陽直上幾重灘蒼煙古栢漢

高廟落日荒茅韓信壇出水槎頭一絲挂穿虹雨
脚兩橋殘土風大抵如南國期會先時俗自安

送王察推績之鄧州

昔向南陽憶洛陽秋橙初熟半林黃車過白水沙
痕闊鴈落鉗盧稻穗長廢壘漢碑金刻字古原秦
冢石為羊太平羽檄何曾有賓主相歡菊薦觴

戲酬高負外鯽魚

天池鯽魚長一尺鱗光鬣動楊枝磔西城隱吏江
東客晝日馳來奪炎赫冷氣射屋汗收額便教斫
膾傾大白我所共樂仲與伯羨君赴約笑啞啞持

扇已見飛鸞翮欲往從之雲霧隔

送何濟川學士知漢州

丞相初得君有志重儒術乃言天下士徒此占清
秩遂懲衒鬻人忝冒十八七進君天祿閣此衆為
第一又薦王張韓恬可與君匹吾儕宜慙羞空自
預朝鞞欲歸無田園強住枉歲日值君乘高軒西
望函谷出當時迎長卿書史傳未悉車馳及襁負
千萬今可詰老農喜君來田租不安率織婦喜君
來縑機當俟畢府胥喜君來替責去暴扶疾苦無
不求前人唯法律畫錦榮既浮康民羨方溢真為

丈夫志豈是名過實

依韻和達觀師聞蟬

飲餘晨露吸餘風
噪遍高枝為俗聾
欲比伯夷清已甚
不食周粟腹常空

依韻和杜相公謝蔡君謨寄茶

天子歲嘗龍焙茶
茶官催摘兩前牙
團香已入中都府
鬪品爭傳太傅家
小石冷泉留早味
紫泥新品泛春華
吳中內史才多少
從此莼羹不足誇

依韻和接花

唯是園人巧
非關元化偏
折條違物理
遷艷得花

權羨女嫁寒壻醜
株生極妍世間多
妾合吾不謂之然

送石昌言學士

混混拍堤瓜蔓水
軒軒銜尾挂檣舩
使君東下只朝夕
父老走迎無後先
古堞秋耕拾銅鏃
長淮瀑雨入壕蓮
鳴猿舞鶴仍持去
不憶承明夜直眠

書南事

大梁國南門駟騎方騰趨
波波一何急
蠻寇圍番禺
番禺本無備
前賴魏大夫
大夫築子城
今得守以須
兵雖不滿萬
閉壁堪指呼
老幼轉木石
壯健

操矛弧廩庫得以完日月不易圖城中舊無井魏
鑿安輓轆魏由飛語去不使立外郭古稱時有待
淺薄皆謂紆曲突與爛額看取報功殊

送吳照鄰都官還江南

霜前江水磨碧銅岸背菱葉翹赤蟲吳郎髮絲蒼
幾縷不羞月上扶桑東羞見清波照人影去時黑
髮吹春風五年歸來婦應喜從此不問西飛鴻

馮子都詩并序

漢霍光愛幸監奴馮子都與梁冀嬖奴秦官事相
對唐李賀作秦宮長辭亦云子都當時已有詩予

因補之

黃金畫車屋韋絮綠車輪牽以五采絲藉以刺繡
茵出入長信宮晝夜將誰親所親美且少玉頰丹
砂脣殷羅縫輕襦明珠攢緇巾半醉臥車中侍婢
躡行塵憶昔廣明亭將軍愛伶頻便房不使殉易
寵在茲辰嗣侯喜驅逐平樂多從賓青絲穿五銖
累室貯百珍歡與子都異矯與子都均用財糞土
擲吐氣日月踐天地可齊久禍患豈有因秋風茂
陵下蒼蘚上麒麟

七月十六日赴庾直有懷

白日落我前明月隨我後流光如有情徘徊上高柳高柳對寢亭風影亂踈牖我馬臥其傍我僕倦肘窸窸重門扃獨念家中婦乳下兩小兒夜夜啼向母問爺若箇邊天性已見厚不嗟羈枕孤不愧棲禽偶內有子相憶外有月相守何似長征人沙塵聽刁斗

采芡

蝟毛蒼蒼磔不死銅盤齧齧釘頭生吳雞鬪敗絳憤碎海蚌出真珠明磨沙漉水葦殼滑斫桂煮釜風波聲齒如編貝嚼明月曼倩不復飢腸鳴莫

論一斛貴與賤堂上狼籍無由行

史氏南軒

庭中碧石盃上結三重山飛光入酒盃舞翠生鬢髮竹林眠黃塵草莎徑欠白鵬主人無倦情窓戶不須關

送河北轉運使陳修撰學士

河隍多宿兵兵食固所須幸時不戰鬪畜養安可無古興十萬師七十萬家輟耕鋤今來歲調餉且與往昔殊不使民轉輓但使民歸租急緩實塞下商賈以利趨關西河東亦如此軍食雖足民賣虛

公乎抱長才當有所畫謨應不貸內府重錦象牙
明月珠邊城預自足寧待臨帑輸莫令稱庭臣為
言桑大夫

奉和寄宣州廣教文鑒師

秋池對門蓮子枯野壁剥月蝸涎塗庭中兩株古
楠樹上有山鳥長相呼當時聯巢接飛者一落梁
宋一海隅扶桑日枝幾千尺光彩不獨生陽烏

送陸介夫學士通判泰州

從來戎馬地饗士日椎牛介胄奉儒服詩書參將
謀隴雲連塞起渭水入關流豈似瀛洲下窮年事

校讎

送徐君章祕丞知梁山軍

蒼壁束江流孤軍水上頭蛟龍驚鼓角雲霧裏衣
裘午市巴姑集危灘楚客愁使君才筆健當似白
忠州

依韻和秋夜對月

陳王苑裏望空虛吳客風前憶具區橫閣漸看河
影轉繞枝還見鵲驚無蟲催織婦機成素露逼鮫人
淚作珠才比陶潛無用處紗巾時任酒沾濡

宛陵先生文集卷第十五

宛陵先生文集目錄卷第十六

和曹光道風拔檜

飲劉原甫家

送監押曹供奉

答仲源遺酒

送張生還和州

李少傅夫人挽詞

送韓寺丞宰蕭山

蔡君謨示弩牙

和原甫省中新菊

和仲源獨夜吟

寄題琨瑤洞

許生南歸

得榘棹戲酬

寄題杭州法喜堂

題滿僧錄西明軒

寄題撫州息心亭

送李太博

送道損司門

送雪竇穎長老

送襄邑杜太博

送晉原喬主簿

病後宿倉

閔尚衣盜袴

胡夫人挽歌

裴直講遺鹹豉

贈荅如晦水梨

送樂職方知泗州

和劉原甫試墨

喜雪

送劉職方知汾州

雪後晚過天漢橋

送崔殿丞知廬州

見水牛拽車

吳太博遺柑子

和晉公東園十題

目錄終

宛陵先生文集卷第十六

和曹光道風拔三檜

飄風西北至樹苦萬繹牽君家三古檜繁根龍地
纏其固謂不拔朱欄擁青塼今同秀林木摧倒誰
復憐安得百力士扶持尚可全慎勿伐作薪豈無
庭燎然

飲劉原甫家原甫懷二古錢勸酒其一齊

之大刀長五寸半其一玉莽時金錯刀長

二寸半

主人勸客飲勸客無天妍欲出古時物先請射

年我料孔子履久化武庫煙固知陶氏梭飛朱
雨天世無軒轅鏡百怪爭後先復聞豐城劍已入
平津淵聊讎二百載儻有書畫傳嗚呼纔十一便
可傾觥船探懷發二寶太公新室錢獨行齊大刀
鎌形末環連文存半辨齊背有模法圓次觀金錯
刀一刀平五千如其文精銅不蠹蝕肉好鉤婉全爲
君舉酒盡跨馬月娟娟

送嘉州監押曹供奉測

舊友尹師魯嘗作送子文文存人已歿行復我何
云平時爲郡尉遐方宜撫軍定過楊雄宅野鶴自

成群

荅仲源太傅八日遺酒

陶潛九月九無酒望白衣何言先一日雙榼忽我
歸借問遺酒誰天宗分日暉明當酌大斗黃菊羔
醅肥李賀諸王孫作詩字欲飛聞多錦囊句將報
慙才微

送張生還和州

山頭孤石望來久天外行人今獨歸藥囊自有留
生術不管淮南木葉飛

李康靖少傅夫人挽詞二首

九月秋風急三川苦霧迷
卞却新隧啟度輦短簫
齊寶劍知終合靈蟾已隕西
松門來會葬車馬幾
千蹄

板輿曾至鄭靈輅此歸周行哭人增慕凝笳月正
秋九原開柩穴故土覆新丘歲晏寒松下茅苦孝
子留

送韓文饒寺丞宰蕭山

吳會未探穴廣陵先看潮橫江百馬怒卷海萬鼙
囂舟楫凌湍發魚龍接浪跳薄言增勇氣少當舉
山瓢

蔡君謨示古大弩牙

黃銅弩牙金錯花銀闌線齒如排沙上立準度可
省括箭溝三道前直穴其度四寸寸五刻塗光歷
歷無纖差蔡侯出此問誰得往年客遺來瑯瑯瑯
瑯築城穿厚壤既獲磨洗爭傳誇莫知歲月孰製
作精妙近世應難加發機高下在分刻令人妄射
功仍賒願侯擬之起新法勿使邊兵死似麻

和劉原甫省中新菊

華省切星斗沉沉嚴燕房秋風茂陵孫種菊爛生
光天晴蝴蝶飛上下舞雙黃劉郎才筆豪移榻吟

在傍日晚吏已散殘景上粉墻有酒無飲伴掇英
襟裾香還思陶淵明弃官歸柴桑東籬獨此物盈
把恨無觴賴有白衣來好事遺壺漿適意各一時
豈乏同舍郎

依韻和仲源獨夜吟

秋鴻聲澀秋絃苦塗金博山煙夜吐寂歷虛堂燈
暈生誰人共聽西窓雨

寄題周敦美琨瑤洞

仙人采玉驅雄龍列山剖璞青腔空因邃爲堂曲
爲室石乳溜壁光玲瓏仙歸龍去草樹長蔽翳不

復人蹤通指壻買墅下峯下洗斲務欲險怪窮地
鱗鹿跡尚莫到安問樵老諸牛童古今未得用
得萬景付與由天公何當歸來斂頭角任從寶我
生白虹陰溪淺水菖蒲綠下有蝦蟇雙眼紅及時
佐酒斫兩股勿使更入明月中

許生南歸

大盤小盤堆明珠海估眩目迷精麓斗量入貢由
掇拾未必一一疵類無不貢亦自有光價此等固
知魚目殊許生懷文頗所似暫抑安用頻增吁倚
門老母應日望霜前稻熟春紅稔歸來爛炊多釀

酒洗蕩幽憤傾盆盂九卿有命不愁晚朱邑當年
是嗇夫

得沙窀榭棹戲酬

蒺藜已枯天馬歸嫩蠟籠黃霜冒榦不比江南楂
柚酸橐駝載與吳人看

寄題杭州廣公法喜堂

淘青研朱畫屋梁黃漆栢障連曲房日暉月色不
須照了了自可窺毫芒夕陰花歛似欲病飛鳥不
驚烏帽郎深山窮谷謾幽僻喜得吳儂是藥囊
題滿公僧錄西明軒

赤萍纔落鄧林外青銅半磨傍露明飛光斜入了
不隔坐卧一榻琉璃平西方古胡黃金質貝葉傳
寫烏行橫謂曉此教居此軒滿壁圖畫遙峯生

寄題撫州戴秀才息心亭

蒼蒼開幽林峯嶺日相對雲歸垂衣纓泉落嚮環
珮仕宦雖有負耳目得以貸俯仰宇宙中晏然維
進退

送臨江軍監酒李太博

三江卑濕地北客宦游稀霧氣多成雨雲蒸易損
衣白醪燒甕羨黃雀下田肥未辨殊方語山歌半

是非

道損司門前日過訪別且云計程二月到
郡正看暗惡海棠頗見太守風味因爲詩
以送行

蜀州海棠勝兩川使君欲賞意已猛春露洗開千
萬株燕脂點素攢細梗朝看不足暮秉燭何暇更
尋桃與杏青泥劔棧將度時跨馬莫辭霜氣冷

送雪竇長老曇穎

朝從雪竇請暮卷雲衲輕莫問居士病自從他方
行吳霜點髭根海鳥隨衆迎安隱彼道場萬事都

忘情

送襄邑知縣杜君懿太博

霜落水未落令君將度河農耕休叱耒女織罷鳴
梭赤幘驅亭長丹砂挈印窠無慙浚儀政才比陸
雲多

送晉原喬主簿

太守登車時我病不能出遙期玩海棠度險馬屢
叱唯畏行邁遲惡欲及春日何爲愛此花曾非桃
杏匹生紅濃復淺瘦蒂脩且密湖傍幾十樹雕盤
擁新漆酒傾瑠璃盆月上歡未畢縣官同遠宦簿

領無督詰刻意詠芳菲追捕李杜失

十一月十三日病後始入倉

曾非雀與鼠何彼大倉爲狐裘破不溫黃狗補其
皮霜花逐落月綴在枯槁枝予年過五十瘦寢冰
生肌

閔尚衣盜袴

昔聞廉叔度能使民多袴多袴非或貪持新不忘
故嗟嗟亦王官奚自門閔汙中府中紋綾袖之呼
馬去左右即其私邀索乃就捕三公出死狗訓導
能有素今同竊鈇者見爾皆此趣

胡夫人挽歌

子哲

已哉胡夫人其壽七十餘其子哀母死一夕髭皓
如髭白髮亦白長號守茅廬扶棺埋吳雲來會傾
市墟誰復向寒月卧冰求鯉魚

裴直講得潤州通判周仲章鹹鼓遺一小餅
金山寺僧作鹹鼓南徐別乘馬不肥大梁貴人與
年少紅泥罌益鳥歸飛我今老病寡肉食廣文先
生分遺微

贈裴直講水梨二顆言太甚荅吳甘三顆
以爲多走筆呈之

綠橘似甘來太學大梨如水出咸陽莫將多少爲
輕重試擘霜包幾辦香

送樂職方知泗州

長堤凍柳不堪折窮臘使君單騎行蘇合輕裘霜
莫犯銅牙大弩吏先迎山旁楚賈連檣泊水上禹
書寒磬清試向郡樓東北望煙波千里月臨城

和劉原甫十二月十日試墨

海神不朝雪不作大梁塵土蔽天高道傍牛喘復
誰問佛寺吹螺空唱嘯相公跪香恬且佚
陛下
減膳心焦勞因君試墨偶有激勇辭壯筆揮長刀

予無柰何亦思飲飲竭甕甕從舖糟

十二月十三日喜雪

三日朔風吹暗沙蛟龍卷起噴成花花飛萬里奪
曉月白石爛堆愁女蝸大明廣庭踏朝駕雉尾不
掃粘宮靴宮中才人承聖顏捧觴稱壽呼南山三
公免責百姓喜斗酒十千誰復慳

送劉職方知汾州

齊

西河風俗厚尚翹古所聞子夏有遺廟干木有遺
墳太守下車日當先此二君不必汾水上秋風看
鴈群

十三日雷後晚過天漢橋堤上行

堤上殘風雪橋邊盛酒樓據鞍衰意盡倚檻艷歌
留海月開金鑑河冰卧玉虬當年洛陽醉偏憶董
糟丘

送崔黃臣殿丞之任廬山

驂駒西行四千里直度經橋百尋水石上菖蒲未
見花蒙頂茶牙初似莆采時應憶故園春故園開
焙亦思人其間杜鵑不中聽掩耳聊看錦雉馴青
崖鞭垂瘦地尾仙人拍節隨鱗起斫取他年跨馬
歸劔棧秦山多折筮

十九日出曹門見水牛拽車

只見吳牛事水田只見黃犂負車輓今牽大車同
一群又與騾驢走長陌印頭闊步塵蒙蒙不似綏
耕泥汨汨一一夜眠頭向南越鳥心腸誰辨白

吳太博遺柑子

太學先生欺綠橘裴如晦近有贈吳興才士與黃柑黃柑似日
勝崖蜜帶葉初擎翠竹籃還料楚王曾未識徒將
萍實託江南

和普公賦東園十題

榭芳亭

結宇東園中種花待春風口歌金縷衣手折枝上
紅今日映綠髮他年羞青銅

清心堂

寂寞外物亂境清心亦清彼皆居深谷此獨處重
城夷齊食薇蔽千古首陽名

石筍

削出青山根峭立碧玉圭不作湘竹老不染帝子
啼不爲盤中蔬豈與煙茁齊

待月亭

明月過三五飛出滄海遲佳人望清夜隔樹光離

離不須磔蝦蟆寒魄自有虧

虛白堂

空堂絕纖塵虛靜自生白長風吹月東窓戶如不
隔漆園茲趣深赤水珠難索

假山

太山不可歷石齒齧人足聊集怪與竒蒼蒼都在
目何須引寒流平地作溪谷

書齋

聖賢有事業皆在經籍中已愛牙作籤可輕山賜
銅還來讀詩禮不用辨魚蟲

小池

小池依小山山晴翠光入無容群蛙鳴間有孤鶴
立曾不起波瀾石郵風自急

紫竹

西南產脩竹色異東筠綠栽蕭映檀脣引枝宜鳳
宿移從幾千里不改生幽谷

山茶

紅蘄勝朱槿越丹看更大臘月冒寒開楚梅猶不
柰曾非中土有流落思江外

宛陵先生文集卷第十六

宛陵先生文集目錄卷第十七

除夜雪

和吳冲卿元日

元日

和仲源暮冬見寄

送韓寺丞

和原甫風花

貽安怒

十六日會靈火

送潘司封知解州

飲酒呈鄰幾原甫

寄渭州王龍圖

雪中赴宿懷鄰幾

送薛虞部

送宣倅馬屯田

觀棹龍舟

二月四日雪

答劉原甫

聞語十方璉長老

垂拱殿起居聞捷

十五日雪三首

聞密賜

送晏寺丞

江鄰幾饌鮓

淘渠

蓬生麻中

賣鹿角魚

夜與原甫步歸

高陽關射亭

京師逢賣梅花

欲訪宋中道

丁右丞挽辭二首

廷老傳沛語戲作

送胥寺丞赴洛

送徐殿丞婺州倅

韓子華招飲

送下第親舊

燕

雨

晴

送胡公踈之金陵

送裴虞部知信州

送李推官之岳州

和南齋畫壁歌

孀婦

送端式歸漳州

送黃殿丞潤倅

揀花

和端式見贈

楊公蘊華亭宰

保之遺水墨扇

送汝陰宰孫寺丞

和曇穎四明十題

目錄終

宛陵先生文集卷第十七

除夜雪

擊鼓人驅鬼漫天雪送寒臘從今日盡花作舊年
看著樹多還墮隨風積更乾明朝預王會畏濕兩
梁冠

和吳冲卿元會

千官車馬闐闐來晝漏始上闐闐開我左右升
龍進昨夜雪飛雲作堆殿前冠劍魚鱗立東風入
仗旗脚迴黃鍾一奏寶扇掩玳簾卷起香霧排鳴
梢未盡霹靂響翠輦已退黃金階聖人端冕御法

座大樂旅作聲和諧群公抃蹈丹墀下尚書奏瑞
四夷懷乘輿却入更衣閣通天絳袍陞玉榻百拜
稱觴萬歲聞兩廊賜食簪裾匝曲傳太定舞綴踈
波旋煙斂飭宮車衛官解嚴多士退日光停午氣
象舒吳君才華天下傑歸來作詩傳石渠石渠祕
邃無凡愚石渠酬唱皆嚴徐我慙短學復在後收
餘掇棄聊以書

元日

頻年無入閤今日預朝元丹陛發金奏侍臣稱玉
鐔旗旌搖細仗雲霧啓千門却出蒼龍闕衣冠萬

馬屯

依韻和仲源暮冬見寄

曾未學黃庭衰頽已可驚詩能如阮籍評不愧鍾
榮玉軫調初美冰壺想更清兔園風雪甚還聽鴈
來聲

送韓子文寺丞通判瀛州

嘗聞河間守介直天下無選才才且殊鐵網收珊
珊瑚瑚得亦難鐵網取亦劬況茲戎馬郊爲貳維
多謨新春度滹池冰上少馳驅

十七日和原甫風花偶書

用其韻

風花不戀枝脫萼亂翻飛自學空中雪寧同垣上
衣繞庭面旋久無著衆鳥爭御何處歸

貽妄怒

飲食無遠近所美貴甘輒南方食蝦蟇密捕向清
吠齒咀口且諱聞語輒忿喘此物何醜惡猶勝螺
螯蜆西蜀亦取之水田名穀犬彼士不爲慙吳人
休獨恹豈須若中州牛羊烹大臠

十六日會靈火

章聖皇帝興三宮三宮鼎峙何崇崇天聖七年六
月尾玉清始災壇宇空于今二十有五載上元後

夜星軫中乃聞會靈五殿火丹焰徹天明月紅千
楹萬棟一夕盡赤煙奔突西南風先時二日車駕
幸 爲民祈福輸清衷大臣驕蹇不從祀岳靈不
歆爲不恭若此示變猶影響宜鑒陛下無惰容神
非怒乙遂及甲天意警聖不警凶不獨洪水累堯
德堯仁未忍流驩共

送潘司封知解州

其父嘗守此州

鹽池暗湧虫尤血紅波爛爛陽烏熱岸旁遺老記
南風五月滿畦吹作雪白徑嶺上橐駝鳴太行山
中騏驥奈古人射利今人同行商不困何由設朱

輜太守自東來先世大夫留故轍是非取與應不
移秦人休銜張儀舌

飲酒呈鄰幾原甫

天地不爭行日月不爭明晝夜自顯晦冬春自枯
榮夸父逐日死共工觸天傾二子不量力空有千
古名寄語賢與愚何嘗見長生我願會良友醉顏
日常頽東海爲酒罇五湖爲杯羹海罄湖且竭盡
倒爲解醒苟死不復知苟生徒牽情項籍乘牛車
馳上廣武城強梁取秦鹿慷慨猶爲輕歸來卧酒
家豈得慙公卿樂亦但如此舉世任營營

寄渭州經略王龍圖

西城橐駝來賀蘭入貢美玉天可汗蕭關夜開月
團團彈筆古峽鳴哀湍前將軍不擐甲取大官今
將軍能撫士尚盤桓河西五郡兵氣完駿馬躍稜
無箭瘢我嗟乘劣不受鞍焉得乞與都人看

二十一日雪中赴宿懷鄰幾原甫

正月東都雪多於舊臘時酒賓臨迫閣野雀集枯
枝馬向西城度花從上苑遲劉郎與江叟相對定
爭棊

送永興通判薛虞部

灰宮盜玉秦樓空南山不老天無窮
薛碑剝爛少文字兩耕拾寶牛蹄中
其旁築城聚貔虎黃土炭業如削
銅西州吏人氣吐虹摧鱗斂角聽相公
少年別乘勤爾躬幙府甚盛瓊瑤叢

送宣州簽判馬屯田兼寄知州邵司勳

寒溪翠拖碧玉帶蒼山晴卧蛻骨龍
水邊苦竹抽肥筍石上老蕨拳紫茸
泊船繫纜宿明鏡昭亭廟古攢瘦松
陰風雨電潭心起雲遮北嶺如墨濃
田秧浸綠白鷺立內史出喜嘉賓從
昔時謝公來賽神蘭肴作椒金作鍾
聯詩娃何名已失板蠹粉落

蟲鳥蹤我鄉復傳召南化磨鏤黑石君亦逢

觀拽龍舟懷裴宋韓李

截春流築沙坻拽龍舟過天池尾矯矯角岐岐千
夫推萬鱗隨驚鴻鵠沉魚龜春三月輕服時薄水
殿習水嬉馬特特來者誰魏公子人不窺車麟麟
集其涯邯鄲倡士交馳銀餅索酒傾玻璃用錢如
水贈舞兒却入上苑看鬪雞擊毬彈金無不爲適
聞天子降玉輦當門虎脚看大旗春風吹花入行
幄紅錦百尺爭蛟螭雲蓋迴綵纜維明年結客觀
未遲

二月四日雪

前日春風初擺條昨夜雪飛深一尺北帝及臘不
行令東皇發煦遭爾厄侵時奪氣四時錯歡問上
天何不責天高地厚語難通俛首下土徒叩額或
言莫信難可聞鶴鳴至微猶不隔休問天問顏蹠
休看花看壟麥

荅劉原甫

生早多交友常恨會遇稀每念相笑語昨是今或
非重惜向時游出處苦乖違從今儻有酒莫問梨
栗微前夕呼我飲遣奴來扣扉暗犯風雪往醉脫

冠服歸夜來新霽月清吐萬里輝劉郎戴幅巾江
叟披褐衣相過無百步誰虞竊訶譏三家若循環
但知具甘肥

聞語十方璉長老

舊居廬嶽寺新化給孤園還享國人供應無塵事
喧有來聽喻筏一悟見吹幡不憶爐峯下臨溪看
飲猿

十一日垂拱殿起居聞南捷

二月雪飛雞狗狂錦衣走馬回大梁入奏邕州破
蠻賊絳袍玉座開明堂腰佩金魚服金帶榻前拜

跪稱聖皇一朝嚴氣變和氣初令漏泄飛四方將
軍曰青才且武先斬逗撓兵後強從來儒帥空賣
舌未到已愁茆葉黃徘徊嶺下自稱疾詔書切責
仍勉當因人成功喜受賞親戚便擬封侯王昔日
苦病今不病銅鼓弃擲無鏢鎗

十五日雪三首

寒令奪春令六花侵百花塘冰膠鷺嘴野水澀芹
牙擁柱輕於絮吹墀淨若沙乳禽飢啄木誰悞撥
琵琶

新雷奮虵甲密雪鬪鵝毛正欲裁輕縠重令著弊

袍沙泉流復凍煙萼圻還韜只待鄰醅熟微聲聽
酒槽

春風九十日一半已銷磨準擬看花少依稀詠雪
多官車猶載炭抱鵲不離窠向此興都盡戴家誰
復過

聞密賜

朝聞政府賀捷回夕賜明月五千枚巍巍聖皇德
所該廟略付與何有哉況未覆穴翦渠魁宜先戰
士老與孩傾肝瀝膽謝不敏豈可便恃張良才

送衛真宰晏寺丞罷長安

捨琴辭苦縣解劍入函關鵲報遠人至馬衝春雨
還荒榛郊北園葱翠國南山歸見蕭何政條令舊
鎬間

江鄰幾饌鱸

泥鱸魚之下曾不享嘉賓又嫌太健滑治洗煩庖
人煎炙亦苦腥未嘗輒向脣江侯昔南官家善無
此珍昨日邀我餐下筋勝紫鱗乃知至賤品唯在
調甘辛

淘渠

開春溝畎春泥五步掘一壟當塗如壞堤車無行

轍馬無蹊遮截門戶雞犬迷屈曲措足高復低芒
鞋苔滑雨淒淒老翁夜行無子携眼昏失脚非有
擠明日尋者爾瘦妻手提幼女哭嘶嘶金吾司街
務欲齊不管人死獸顛啼

蓬生麻中

麻畦無曲本蓬質有樛莖所託脩仍直安能縱復
橫擇鄰聞舊母益友記諸生蕭艾從茲遠蒿萊不
可并何嗟蔣詡逕孰念衛人行儻匪緣其地秋風
廣漠驚

賣鹿角魚

水中龍角而足海小魚角蠢蠢不擬龍乃擬鹿譬
彼蝸抗鬪犢漬以醎鹵久且醜持賣都市叅鼎鍊
此人何苦馱猪羊甘爾臭味不飽腹

夜與原甫江家步歸 二十三日

丹砂漆盤盛井水冷浸半坼山櫻花始見春色不
柰喜黃昏招飲夜還家劉郎居南我居北陌上泥
開天正黑風吹蠟燭燒未明素絲作履惜不得

高陽關射亭

星弧射狼夜夜張角弓備寇不可忘將軍屯師古
關下不尚武力何由強日與兵官來會此弓須射

硬箭射長更如羿中九鳥斃獨見杲杲明扶桑

京師逢賣梅花五首

此土只知看杏藥大梁亦復賣梅花此心還似庾
開府不惜金錢買取誇

驛使前時走馬迴北人初識越人梅清香莫把茶
蘄比只欠溪頭月下桎

憶在鄱君舊國傍馬穿脩竹忽聞香偶將眼趁蝴
蝶去隔水深深幾樹芳

曾見竹籬和樹夾高枝斜引過柴扉對門獨木危
橋上少婦髻髮猶戴歸

此去吾鄉二千里不看素萼兩三年移根種子誰
辛苦上苑偷來直幾錢

三月五日欲訪宋中道遇雪而止

蝴蝶飛時雪鬪輕滿街撩亂得人驚欲尋宋子東
城去馬畏春泥不敢行

觀文丁右丞挽辭二首

預政公槐亞談經帝席陳儉恭齊國相清淨漢廷
人去夢嘗爲蝶遺文不解麟一聞車馬幸豐賜及
孤臣

春風百花發露挽九原歸白馬悲鳴駐黃鸝下上

飛隴邊新栢盛門外弔人稀獨見東牀客攀車淚
濕衣

廷老傳沛語戲作

夷門市裏侯羸老公子時能釋禮過莫問孟嘗招
致客薛中遺俗尚應多

送胥平叔寺丞赴洛

單車細馬出虎牢春雲黝黝百舌喙穀兩已近花
欲盡秉燭夜飲朝坐曹因君重思昔日歡醉筆狂
掃嵩丘高于今零落二十載縱在各各歎二毛試
採上陽何首烏刮切仍致苦竹刀俗情相望亦異

此競欲折筍籠含桃

送婺州通判徐殿丞

赴上當在後年夏

疾湍怒蛟龍不畏東風逆
汙汙奔長淮千里在咫尺
辭梁始及晨過宋尚未夕
南州豈難到何處淹
行迹

三月十日韓子華招飲歸成

清明曉赴韓侯家自買白杏丁香花
雀眼塗金銀
茂籠貯在當筵呼舞娃舞娃取捧笑
向客不顧插
壞新烏紗朝來我舍報生子賀勸大白浮紅霞
酒
狂有持梧桐板暴謔一似鄱陽槎
袒楊擊鼓禰處

士當時偶脫猛虎牙
褊衷不容又何益
鸚鵡洲上空蕪葭

送下第親舊

花開風雨惡坐見紛紛落
明日結子時又復有脫
萼莫嗟樹漸老樹老子亦著
共愛西枝繁不數東
枝弱他年會有春却看西枝薄

鷺

一避吳宮火千年楚屋春
翅迎風雨健聲入戶庭
頻掠水過長渚街蟲落覆塵
休將漢皇后故故比
輕身

雨

春雲易成雨一日幾迴陰鷺濕飛猶快花寒色更深
邀車愁客遠盤馬畏泥侵向晚晴光吐西牕綠影臨

晴

風掃天如鑑雲開日似萍苑花猶帶濕蔬甲已微
青蝶翅粉應薄塘瀟波更渟尋春不惜醉莫笑髮
星星

送胡公疎之金陵

綠蒲作帆一百尺波浪疾飛輕鳥翻瓜步山傍夜

泊人石頭城邊舊游客月如冰輪出海來江波千
里無物隔自古有恨洗不盡于今萬事何由白依
稀可記鮑家詩寂寞休尋江令宅楊花正飛鮎魚
多食膾舉酒謝河伯但令甘肥日飽腹誰用麒麟
刻青石去舸已快風亦便寧同步兵哭車輓

送裴虞部知信州

攢青歷歷正面山刺史日坐雲屏間楚人竟握水
精璞漢女買作月珮環時惟產寶不重穀願當化
俗無弃管徃辭丞相相有言物景清絕何由攀

送李推官之岳州

崑崙鷺子五兩竿霧露薄水平湖寒風帆羨滿八
百里夕從岳陽樓上看魚跳鷺立月鉤下星斗爛
爛垂欄干羽書不到罇俎裏蠻兵況去荆楚安試
尋燕公舊賦筆磨圭刻碧獨可完

和和之南齋畫壁歌

終南下臨長安城峻欄高檻黃金羸嵩山亦近洛
陽陌鮮車怒馬一日程大梁平廣匝千里不見雲
峯來眼底其間自有高趣人掃室呼工崑壑啓初
疑巨靈勇擘華不比將軍能聚米暗雨輕煙滿室
中塵事如脂一朝洗又將餘力作修竹石上數莖

風撼玉葉斜枝亞寒聲盡節老根孳生意足何須
踐苔眠綠陰然後始爲嵇阮公三賢歌詠已見意
舞女不省頻整簪

媯婦

黃金一丸入雲端群貧望逐滿長安衆人爲貴媯
不惜弃擲如泥資彈射藏身葉底有能鳴辜負春
風拖雨翻不飛上天訴至珍幾人辛勤揀砂石

送端式歸漳州

來居天王都常夢苦竹溪乃識高僧趣不爲利物
迷海燕乘華屋區區竟銜泥安知矯翼鷗豈類斷

尾雞性同而質殊何必莊指齊

送黃殿丞通判潤州

前年江州飛火龍樓殿化盡山將鎔今聞棖棟復
華壯大閣渠渠出波上南徐別乘簡且閑下馬岸
旁呼畫舫永日江風不畏人檝師猱獍欺白浪衣
上京塵莫厭多斗擲中流雲在望

揀花

紫絲暈粉綴薜花綠羅布葉攢飛霞鶯舌未調香
萼醉柔風細吹銅梗斜金鞍結束果下馬低枝不
礙無闌遮長陵小市見阿姊濃薰馥郁升鈿車莫

輕貧賤出閭巷迎入漢宮人自誇

次韻和端式見贈

不爲阮步兵發詠怨朝陽不學屈大夫行吟思攀
芳其雨豈無時細佩空自香吾道不苟合我懷固
有常江南一畝宅近在句溪旁仕官且如此夢寐
安敢忘以予論言多重歌木桃章

楊公蘊之華亭宰

月徑千里大中有神娥宮宮旁種玉桂柯葉垂瓏
瓏蝦蟇穴其根出輒氣墨蒙光魄縱復吐血赤如
頑銅不知從何時更使人蹤通年年折桂枝寬少

尚易充今年初都盡秃株立童童株秃莫爾攀墮
雲雙手空歸來走海上買鶴問吳翁

端午前保之太傅遺水墨扇及酒

畫扇雙酒壺置前兵吏立言將國匠奇重以風義
執樹石冰上看山河月中入便持菖蒲飲不畏青
蠅及

送汝陰宰孫寺丞

扁郎唱榜鷺尾下潁水落日蛇鱗生綠蒲被岸漁
網舉黃鳥啄甚縹車鳴吏無詬粗官止來不借魴
鱖與吏烹饋吏人情見里黨官非喜慢知官清

和曇穎師四明十題

雪竇山

重雲不藏春深竇常有雪曉月號松猿晴壁挂海
霓終恍無心人區區佩環玦

龍隱潭

老龍戀潭窟不雨亦不雲吐涎出溪滑吹腥隔林
聞疾雷驅未去魚鼈競紛紛

含珠林

山爲驪龍蟠谷作驪龍顛珠樹存其間誰採明月
來何須循海隅笑蚌未成胎

偃蓋亭

既將茅覆簷復有松爲蓋五里入山時憇此得寒
籟曾無康樂游但見雲衲會

雲外庵

山僧好寂靜入雲恨不深峯間一雨昏林表孤燈
沉往來有猿狖呼嘯自成音

石筍峯

巨石如龍孫聳聳煙霧裏明明落落溪口納納喧灘
齒何當助齋孟菌菴徒爲美

宴坐巖

智覺禪師
於此不睡

心危身亦危衽席尚顛墜如何崑石上來坐自安
意能諭死生間無論寤與寐

三層瀑

山頭出飛瀑落落鳴寒玉再落至山腰三落至山
足欲引煮春山僧房架剗竹

丹山洞

山無鳳皇飛洞有仙人跡蝙蝠大如鴉莓苔偏上
屐自慙無道骨安問緣雲客

獅子巖

崑形若狻猊不能千里走豈無鳥獸群當假風雷

吼寄謝樓息人想像真妄有

宛陵先生文集卷第十七



